

rin, per sier Tadio Contarini e sier Francesco Duodo, provedadori sora i ornamenti di le done, per aver contrafatto le lexè per le noxe di soa nuora, andò in colegio a l'apelation e fo laudata. Ave 12 bona, una taja.

*Copia di una parte presa in pregadi
a dì 8 octubrio 1505.*

Cum sit, che del 1497, a dì 17 avosto, fosse preso, in questo consiglio di pregadi, che se dovesse far solamente per ditto consejo li savij dil colegio, casieri, provedadori sopra l'arsenal, provedadori di zente d'arme, oratori, sindici e pagadori in campo, tutto lo resto di officij far se dovesse per el nostro mazor consejo, come è debito e conveniente, con li muodi, condition, declaration et pene, come in dita parte se contien; et essendo stà interota la predita parte per qualche offitio, che far non si doveria per questo consejo, et per le terre e luogi aquistadi da nuovo, el sia necesario più stretamente, proveder, a ziò che le leze et ordeni nostri siano observadi, secondo la intention de questo consejo, imperò: L'anderà parte, che la parte sopra scritta sia observada in tuto e per tutto, secondo el tenor et continentia de quella, intendandose che, oltra i soprascritti officij, li officij et magistradi di le terre et luogi aquistadi da nuovo, *de cætero* far se debino per dito nostro mazor consejo, con le pene e striture in dita parte contenute, et soto pena di ducati 200 a chi contrafacesse a quella, da esser scossa per i nostri avogadori de comun, senza altro consejo, et la mità sia de lor avogadori, et l'altra mità sia dil nostro arsenal; et per mazor valitudine di quella, questa parte sia messa et confirmada, per el predito nostro mazor consejo. Et fu presa; et cussì *etiam* presa in gran consejo.

114

Dil mese di novembro 1505.

A dì primo, fo il zorno di Ogni Santi. El principe fo a messa in chiesa, con li oratori, *videlicet* Franza, Spagna, Hongaria, e Ferrara. Et è da saper, che, per avanti, mai l'orator di Spagna andava con la Signoria, per caxon di non andar di soto de l'orator di Franza; al presente, poi fate le noxe, essi do oratori si trovono e si abrazono e basò; et cussì ozi l'yspano à comenzà venir con la Signoria. Era *etiam* domino Leonardo Bota, orator di cremonesi.

Da poi disnar non fo 0.

A dì 2, domenega. Fo gran consejo. Fato avoga-

dor di comun, sier Francesco Orio, fo provedador a le biave, *quondam* sier Piero, in luogo di sier Alvixe Zorzi, ch' a acetado capitano a Bergamo. El qual sier Alvixe Zorzi fo balotado in colegio, a requisition di oratori cremonesi, che, atento li stranij portamenti di sier Bortolo Minio, podestà, et li rebuffi fatti a' primarij citadini, et manzarie fate per li soi oficiali, si dovesse de li mandar un avogador. Et cussì fo terminato mandar; ma, hessendo el predito sier Alvixe Zorzi rimaso a Bergamo, fo in loco suo electo sier Antonio Zustignam, dotor, che andasse; et tutti tre li avogadori fo balotà in colegio, e questo rimase e andò.

A dì 3. Fo la matina fato l' officio di morti, *juxta* il solito, in chiesa. Poi, reduto il colegio, fo letere di sier Domenego Capello, capitano di le galie di Barbaria. Dil zoner in Barbaria, et di quelle occorrentie; et quelle galie hanno fato ben, et ben farano; et à quasi conzata la batalation di Tunis, che *alias* fu fata per caxon di corali di Prioli e compagni *etc.*, *ut in eis.*

Da poi disnar fo colegio, per dar audientia.

A dì 4. Da poi disnar fo pregadi. Et fo leto le infrascripte letere:

Di Roma, di sier Domenego Picani, el cavalier, orator nostro. Come il papa vol far cardinali; et è stà fato concistorio, et leto la nova di l'acquisto per il re di Spagna di Mazachebir, loco su la Barbaria; et quel re vol ajuto dal papa, come capo di la christianità, *videlicet christianissime*, et altro.

Di Hongaria, di Zuam Francesco Benedetti, secretario nostro, date a Buda; et fo cinque letere molto copiose. Zercha quella dieta si faceva, di baroni e prelati, de li; et come era venuto il conte paladin, zovene di età di anni 15, con cavali 2000, con gran reputation, a far reverentia al re; et che la dieta era stà expedita, *videlicet* decreto, che si 'l re muor senza fioli maschi, sia electo per re uno di baroni di Hongaria e non altri; *item*, che li beneficij e abatie ecclesiastice non si dagi ad altri cha hongari. Et questo feno, perchè par che uno fradello di la presente raina havia auto dal re certa abatia di grande intrata et altri ordeni, *ut in capitulis.* Et par ehe, inteso tal cosa, la raina, ch' è francese, et ha una fiola di mexi..., nominata *etiam* lei Anna, dimandò a li baroni quello saria di lei poi la morte dil re; e fo decreto, che l'avesse l'intrada à il re, ch' è ducati 50 milia, in vita; et la fiola sia maridada secondo il suo grado, *etc. ut in litteris* longe e molto copiose.

114